

PEMBERITAHUAN PERTANYAAN

DEWAN RAKYAT, MALAYSIA

PERTANYAAN

: LISAN

DARIPADA

**: YB LAKSAMANA PERTAMA (B) MOHAMAD
IMRAN BIN ABD HAMID**

KAWASAN

: LUMUT

TARIKH

: 19.6.2014 (KHAMIS)

NO. SOALAN

: 82

YB LAKSAMANA PERTAMA (B) MOHAMAD IMRAN BIN ABD HAMID
minta **MENTERI PERDAGANGAN ANTARABANGSA DAN INDUSTRI**
menyatakan Adakah Kementerian bercadang mengambil pendirian
menghentikan rundingan TPPA seterusnya menarik diri daripada
menyertainya kerana dilihat sebagai percubaan Amerika menjajah negara
membangun yang boleh menyebabkan Malaysia terus berada dalam ehsan
Amerika untuk terus membangun.

Jawapan

Tuan Yang DiPertua,

Malaysia setakat ini telah menandatangani 6 Perjanjian Perdagangan
Bebas (FTA) Dua Hala dan 6 Perjanjian Perdagangan Bebas (FTA)
Serantau.

FTA-FTA tersebut adalah:

- i) Dua hala (ditandatangani pada):
 - a) Malaysia-Jepun (13 Dis2005);
 - b) Malaysia-Pakistan (8 Nov 2007);
 - c) Malaysia-New Zealand (26 Oktober 2009);
 - d) Malaysia-India (18 Feb 2011);
 - e) Malaysia-Chile (13 Nov 2010); dan
 - f) Malaysia-Australia (22 Mei 2012).
- ii) Serantau (ditandatangani pada):
 - a) Kawasan Perdagangan Bebas ASEAN (AFTA) (28 Jan 1992);
 - b) ASEAN-China (29 Nov 2004 – Barang, 14 Jan 2007 – Perkhidmatan Pakej 1, 15 Ogos 2009 – Pelaburan, 1 Jan 2012-Perkhidmatan Pakej 2);
 - c) ASEAN-Republik Korea (24 Ogos 2006 – Barang, 21 Nov 2007-Perkhidmatan, 2 Jun 2009-Pelaburan) ;
 - d) ASEAN-Jepun (Perdagangan Barang);
 - e) ASEAN-India (Perdagangan Barang 13 Ogos 2009); dan
 - f) ASEAN-Australia-New Zealand (27 Feb 2009).

Semasa lawatan YAB Perdana Menteri ke Turkey pada April 2014 yang lalu, Malaysia telah menandatangani perjanjian perdagangan bebas dengan Turki dan dijangka akan mula berkuatkuasa pada tahun 2015.

Tuan Yang Dipertua,

Faedah-faedah yang diperolehi dari FTA antaranya:

- i) akses pasaran bagi pengeksport dan pembekal perkhidmatan Malaysia dipertingkatkan melalui layanan keutamaan (*preferential treatment*);
- ii) menyediakan sumber input dan bahan mentah bagi industri tempatan pada kos yang lebih murah dengan pengurangan atau pelupusan duti import;
- iv) memperkuuhkan kedudukan Malaysia sebagai destinasi untuk pelaburan asing (*foreign direct investments – FDI*);
- v) mempromosi bina upaya melalui kerjasama ekonomi dan teknikal; dan
- vi) meningkat keupayaan dan daya saing industri Malaysia melalui persaingan yang lebih kompetitif.

Malaysia sebagai negara yang mempunyai sistem ekonomi yang terbuka amat bergantung kepada perdagangan antarabangsa. Pada tahun 2012, jumlah perdagangan negara adalah 1.7 kali jumlah KDNK, meletakkan Malaysia sebagai antara negara yang amat banyak bergantung kepada perdagangan antarabangsa, iaitu negara ketiga di belakang Singapura dan Hong Kong antara negara-negara Asia.

Malaysia mendapat faedah daripada FTA. Sebagai contoh, sejak FTA antara China dan ASEAN pada tahun 2005, perdagangan Malaysia dengan China telah meningkat tiga kali ganda kepada RM203.2 bilion pada tahun 2013 berbanding RM67.1 bilion pada tahun 2003. Eksport Malaysia ke

China juga meningkat lebih dari tiga kali ganda kepada RM97 bilion bagi tahun 2013 berbanding RM25.8 bilion pada tahun 2003.

Satu contoh lagi ialah Perjanjian Perdagangan Bebas Malaysia-Australia (MAFTA), di mana Australia telah menghapuskan duti ke atas 100% produk yang diimport dari Malaysia bermula pada 1 Jan 2013 secara serta merta apabila perjanjian tersebut berkuatkuasa. Ini telah menjadikan produk Malaysia lebih kompetitif di pasaran Australia. Manakala Malaysia masih melaksanakan liberalisasi produk bagi import dari Australia secara berperingkat.¹

Tuan Yang DiPertua,

Malaysia menyambut baik segala usaha liberalisasi perdagangan yang dapat mewujudkan akses pasaran yang lebih baik. Itu sebabnya kita menjadi ahli WTO, ASEAN, APEC, dan pertubuhan antarabangsa yang lain. Memandangkan perkembangan proses WTO yang perlahan, negara-negara seluruh dunia telah menandatangani perjanjian perdagangan dua hala dan serantau. Pada masa kini, terdapat kira-kira 583 FTA yang telah berdaftar dengan WTO dan daripada jumlah itu, 379 FTA sedang dilaksanakan.²

TPP merupakan rundingan perjanjian yang melibatkan 12 negara Asia Pasifik iaitu, Brunei, New Zealand, Chile, Singapura, Amerika Syarikat, Australia, Peru, Vietnam, Malaysia, Canada, Mexico, dan Jepun. Kerajaan

menjangka dengan TPP, negara ahli memperoleh akses pasaran bebas cukai sebesar 800 juta orang dengan gabungan KDNK yang sejumlah AS\$27.5 trilion. Ini secara langsung menyediakan akses pasaran global yang lebih besar kepada produk-produk tempatan seterusnya memberi peluang yang lebih besar kepada peniaga tempatan untuk memasarkan produk-produk mereka ke pasaran TPP. Sebagai negara yang bergantung kepada perdangangan luar, maka adalah rasional bagi Malaysia untuk terlibat di dalam inisiatif ini.

Tuan Yang DiPertua,

Malaysia tidak dipaksa untuk menyertai mana-mana rundingan perjanjian termasuk TPP dan tidak pernah melihat TPP sebagai satu percubaan Amerika Syarikat untuk menjajah negara kita. Malaysia menyertai TPP kerana Malaysia berpendapat ianya akan memberi faedah jangka panjang kepada Malaysia. Rasionalnya adalah sama dengan penyertaan Malaysia dalam ASEAN dan Kawasan Perdagangan Bebas ASEAN iaitu AFTA. Sekiranya dilihat, Malaysia telah mendapat faedah dari penyertaan dalam ASEAN dan AFTA. Dari segi statistik, perdagangan Malaysia dengan ASEAN telah meningkat lebih dari 7 kali ganda kepada RM375 bilion pada tahun 2013 berbanding RM52.2 bilion pada tahun 1991. Sekiranya Malaysia tidak menyertai TPP, kredibiliti Malaysia sebagai negara perdagangan yang terbuka dan maju akan terjejas. Malah, pengeksport Malaysia akan menghadapi saingan hebat di pasaran TPP berbanding negara-negara pesaing yang menjadi ahli seperti Viet Nam dan Singapura akan mendapat layanan keutamaan. Tambahan pula, Malaysia akan

kehilangan layanan keistimewaan Generalised System of Preferences (GSP) Kanada yang akan tamat pada tahun 2015.

Dari segi pelaburan, sekiranya Malaysia tidak menyertai TPP, pelabur asing mungkin lebih cenderung memilih negara ahli TPP lain sebagai destinasi untuk pelaburan mereka memandangkan produk pengeluaran mereka dapat menikmati manfaat akses pasaran melalui layanan tarif berkeutamaan di antara negara rakan TPP. Ada juga kemungkinan pelaburan asing yang sedia ada di negara kita akan berpindah ke negara ahli TPP contohnya ke Negara Viet Nam. Ini akan menjadikan peluang pekerjaan dan seterusnya ekonomi negara.

Selain itu, pasaran TPP di jangka bertambah besar dengan penyertaan beberapa negara anggota APEC lain yang telah menunjukkan minat untuk menyertai TPP seperti Chinese Taipei, Filipina dan Korea Selatan. Pengecualian Malaysia daripada TPP akan menyebabkan Malaysia ketinggalan dalam rantaian bekalan serantau (*regional supply chain*) pada masa akan datang. TPP juga dilihat sebagai satu platform untuk merangka peraturan perdagangan dan pelaburan alaf baru dan Malaysia tidak akan mendapat kelebihan sebagai '*first-mover*' untuk merangka peraturan-peraturan perdagangan dan pelaburan di dalam perjanjian tersebut sekiranya tidak menyertai TPP.

Ingin saya tegaskan bahawa objektif Kerajaan dalam rundingan TPPA adalah amat jelas iaitu kepentingan negara mesti dipertahankan, kita tidak terdesak untuk menyertai proses rundingan ini dan Malaysia hanya

berunding dengan terma-terma yang boleh di terima pakai negara. Sepertimana yang dinyatakan oleh YAB Perdana Menteri di Tokyo, Malaysia hanya akan menandatangani perjanjian jika ia menguntungkan negara.

Oleh yang demikian, adalah penting untuk Malaysia menyertai rundingan supaya kita dapat menetapkan perkara-perkara yang kita ingin ketengahkan dan kita dapat menyuarakan perkara-perkara yang menjadi keimbangan kita dan ingin kita lindungkan.